

1. जम्मू—कश्मीर विधानसभा दा बजट इजलास कल्लै थमां शुरु होआ करदा ऐ। एह्दे बवस्थित आयोजन लेई सब्बै तैयारियां करी लैती गेदिआं न।
2. बजट इजलास कोला पैहले अज्ज नेशनल कांफ्रेंस ते कांग्रेस पार्टी आसेआ अपने—अपने पार्टी विधायक दल दिआं बैठकां लाइयां जा करदिआं न।
3. जम्मू—कश्मीर सरकारै गैर—कनूनी तौरा पर खान्नां कड्डने खलाफ सख्त रौंऽ अखितयार करदे होई एह्दी रोकथाम लेई सख्त कार्रवाईयां बी रंभियां न।
4. उपमुख्यमंत्री सुरिंदर चौधरी होरें मनुखता दी सेवा लेई लोक—हितैषी गतिविधियां चलाने दी जरूरतै उप्पर जोर पाया ऐ।
5. लेफ्टिनेंट गवर्नर ते मुख्यमंत्री होरें लोकें गी अज्जै थमां शुरु होए दे रमजान दे पवित्तर म्हीने दिआं ममारखां दित्तिआं न।

<><><><><><>

श्वधानसभा दा बजट इजलास कल्लै थमां शुरू होआ'रदा ऐ। उपराज्यपाल मनोज सिन्हा होर कल बडलै 10 बजे विधानसभा गी संबोधत करगन। ओह सारे मिनबरें दी मजूदगी च औपचारिक तौरा पर सदन गी संबोधत करगन। सत्र गी सुचारू ढंगै सिर चलाने लेई सारे इंतजामें जियां सुरक्षा ते होर दुए लोड़चदे बंदोबस्त कीते गेदे न। सत्र दरान बजट सरबन्धी ते प्रशासन मतलक केई सारे महत्वै आले मामलें पर ध्यान केन्द्रित करदे होई खित्ते दी आर्थिक गतिविधिएं गी प्रमुख तौर पर तवज्जो दित्ती जाग।

< > < > < > < > < > < >

बजट इजलास दे शुरू होने थमां पैहले नेशनल कांफ्रेंस नै अज्ज इक महत्वै आली बैठक सददी ऐं पार्टी नेता मुबारक गुल होरें जानकारी दित्ती ऐ जे एह बैठक दपैहरी 2 बजे मुख्यमंत्री हुंदे अधिकारिक आवास स्थान पर लग्गोग। इस बैठक दी अध्यक्षता मुख्यमंत्री उमर अब्दुल्ला होर करगंन। इस दरान बजट सने होर केई सारे महत्वै आले मामलें पर चर्चा होग। तोआई कांग्रेस पार्टी दी बी अज्ज दपैहरी 2 बजे जम्मू आले पार्टी सदर दफ्तर च बैठक लग्गोग। पार्टी नेता निजामुद्दीन भट्ट होरें पार्टी दे सारे विधायकें गी इस बैठक च शामिल हाने लेई साददा दित्ता ऐ।

<><><><><><>

केंद्रीस सेहत मंत्री ते बीजेपी अध्यक्ष जे.पी.नड्डा होरें पार्टी विधासकें थमां राजनीतिक औहदे दे लालच थमां उप्पर उट्ठयें निर्वाचन क्षेत्र दे विकास गी तरजीह देने ते नागरिकें कन्नै डूंहगे ते मजबूत सरबंध बनाई रखने दा आह्वान कीता। कटरा च 2 रोजा विधायक प्रशिक्षण शिविर दे समापन सत्र गी संबोधत करदे होई उनें विधायकें गी सार्वजनिक शकैतें दा असरदार ढंगै सिर हल करने ते समावेशी विकास जकीनी करने आस्तै अच्छे श्रोता बनने पर जोर पाया। इस मौके पर केन्द्रीय राज्य मंत्री डॉ. जितेन्द्र सिंह होर बी मजूद हे। उनें विधानसभा च सबूतें आधारत बैहस दी जरूरता पर जोर पाया। उनें पार्टी दे विधायकें गी अपील कीती जे ओह तर्क ते तथ्यें कन्ने जनता दे मामलें गी उजागर करगं। मीडिया कर्मिण कन्नै गल्ल करदे होई डॉ. जितेन्द्र सिंह होरें आखेआ.....बाईट

<><><><><><>

गैर—कनूनी तौरा पर होआरदे खनन पर रोक लाने दे मकसद कन्नै इक बड्डी कार्रवाई करदे होई जम्मू—कश्मीर सरकारै जम्मू दे जिऑलजी ते माईनिंग मैहकमे दे ज्वाईंट डरैक्टर एच.एल. लंगेह होरें'गी प्रशासनिक विभाग कन्नै अटैच करियै तुरत प्रभाऽ कन्नै उंदे सब्भनं अख्तियारें पर हाल दी घडी रोक लाई दित्ती ऐ। एह कार्रवाई उपमन्त्रि सुरिंदर चौधरी हंदे

निर्देशों पर कीती गई ऐ जि'नें सरकारी कम्में च पारदर्शिता ते जोआबदेही दे प्रति वचनबद्धता गी फही पक्का करने दी गल्ल आखी ऐ। सरकार आसेआ खित्ते च गैर—कनूनी तौर पर खान्नां कड्डने सरबन्धी चैताएं दा नबेड़ा कीता जा'रदा ऐ कीजे इ'नें गतिविधिएं कन्नै पर्यावरण ते राजस्व, दौनें गी गै बड़ा भारी नुक्सान झल्लना पौंदा ऐ। जीऑलजी ते माईनिंग मैह्कमे दे डरैक्टर होरें'गी निर्देश दित्ता गेआ ऐ जे ओह् गैर—कनूनी तौरा पर खान्नां कड्डने सरबन्धी शकैतें बारै इक रिपोर्ट जमा करोआन ते कन्नै सरबन्धत अधिकारिणें गी इब्बी निर्देश जारी कीता गेआ ऐ जे ओह् खन्नां कड्डने सरबन्धी नियमें दी अमल—आवरी गी हर हाल च जकीनी बनान।

Rana Camp Poonch

Dy. CM Mankind

Ramzan Greetings

CS SBM

<><><><><><>

Nasha Mukht Seemayein kathua

बन्ने आहले इलाकें च नशे दी कवैतू दा मुकाबले करने लेई इक असरदार गैह पुट्टदे होई कठुआ दे डिप्टी कमिशनर डाक्टर राकेश मिन्हास होरें कठुआ दे सरकारी डिग्री कॉलेज थमां 'नशा मुक्त सीमाएं' दे नांऽ कन्नै मोटरसैकल रैली गी झंडी दस्सियै रवाना करोआया। शक्ति उद्घोष फाउंडेशन आसेआ आयोजित इस रैली च 15 महिलाएं सने कुल 25 मोटरसैकल सोआर हिस्सा लैऽ करदे न जेहड़े 5एं दिनें दी अवधि दरान कठुआ—जम्मू—अखनूर—रजौरी ते पुंछ सर्किट दे बक्ख—बक्ख हिस्सें थमां लंग्घदे होई नशे दी कवैतू दे माड़े नतीजें बारै लोकें, ते खासकरियै नौजवानें गी जागरूक बनाडन। डाक्टर मिन्हास होरें नशे दी कवैतू पर रोक लाने लेई सांझे जतनें दी जरूरत पर जोर पाया ऐ ते सभनें लोकें, एजेंसिएं ते संस्थानें गी गुजारिश कीती ऐ जे ओह नशा—मुक्त समाज दे निर्माण च अपनी जोगदान देन।

<><><><><><>

Highway

जम्मू—श्रीनगर राष्ट्री जरनैली सिड़कै पर जात्तरी गड्डिएं दी आओजाई पूरे बवस्थित ढंग्गै'नै जारी ऐ। ऊआं लोकें गी एह सलाह बी दित्ती गेई ऐ जे ओह अपनी लेन च पूरे अनुशासन कन्नै गड्डी चलान ते ओवरटेक करने कोला बी बचन कीजे ईआं करने कन्नै बेवजह जाम लग्गने ज्नेय हालात बनी सकदे न। लोकें गी इब्ब आखेआ गेआ ऐ ऐहतियात दे तौर पर फिलहाल छड़ा दिनें बेल्ले गै सफर करन ते रामबन ते बनिहाल बश्कार बेवजह गड्डी खडेरने कोला बी परहेज करन कीजे इ'नें इलाकें च फ्हाड़ें परा ल्हास—परिसियां ते कुप्पड़ पौने दी शँका होई सकदी ऐ। तोआई श्रीनगर—सोनामर्ग—गुमरी सिड़क सने भद्रवाह—चंबा सिड़क, मुगल रोड ते सिन्थन रोड अजें बी गड्डिएं दी आओजाई लेई बंद न।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 ब'रें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर—अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी पिन कोड 180001 उप्पर उप्पर 07 मार्च 2025 थवां पैहले—पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>